

四庫全書

集部

欽定四庫全書

秋崖集卷十四

宋 方岳 撰

詩 七言古體

清明

何哉清明乃爾愁雨聲中間花事休一春留春不肯住
况無酒與春相醕牆頭筍已吹成竹奪我齋廚蒼玉束
滿牀書卷為不平亦怨秋崖長負腹

春暮

人生會有百年極春事略無三日晴
豈惟坐隔海棠醉亦未曾逐楊花
行綠樹陰陰遽如許黃鳥飛飛寂
無語先生欲作送春詩似此一春
那用爾

出關

一坐一百二十日柳初黃落今青青
索興徑去有忙事忽憶曾與春
丁寧牡丹徑尺妙天下許釀醺醪
呼娉婷到家二月亦晚矣未辨翠
色官窰餅

松棚

濤聲盤空吹海立夜拔蒼髯老蛟泣陰森一片翠微寒
不放驕陽排闥入歸來歸來乎山中人間六月方蘊隆
寧減明月添清風誰其云者十八公

日食守局

乙己之秋七月朔太陽無光天索寞辟雍諸儒坐讀書
談古談今自驚愕玉皇不受紫宸朝百官拜表羣陰消
明朝丞相做禮數宣押歸堂只如故

秋江引

水天一色磨古銅落日欲沒蘆花風雙飛野鴨忽驚起
漁歌漸遠秋江空煙波渺渺無終極中有江南未歸客
短篷夜泊洲渚寒孤鴈橫江聲正急

爭棋

江南底處無楊柳海內何人解詩酒春簑雨濕蕙煙寒
閒却鷗沙釣竹竿塞雲漠漠方笞兵油幢安用白面生
東山屐齒蘚花綠鶴唳風聲到棋局

過采石

靈官行雨鱗幢濕雷吼黑風吹水立英雄不奈劍花寒
然犀夜午魚龍泣雪浪掀天箭能急紫茸投筓旄頭失
吳宮酒醒岸花愁不是龍驤勇無敵

戲簡文孺林劑局

廣文擅寒不可忍月邊頓作乘鸞興府公給告使者嗔
甘坐畫眉取歸徑曉攜手版中書堂春風滿身芝朮香
物無疵癘清晝長倘有囊中醫國方

書斷厓

老木枯藤絞蒼石嵐重雲寒土花碧巨靈探璞夜不眠
斧斤睥睨魚龍泣中分一片落溪邊此祕未覩乾坤前
試留名字與後世戒爾謹護青瑤鐫

贈背書人王生

我無王書二千六百紙空有六經四十三萬字荒山寒
入雪夜燈三十年來無本子壁魚不生糊法死君欲如
何染君指石爐煮餅深注湯自向胸中相料理

三禽言

麥熟熟黃雲壓肩堆滿屋大兒燒穰事治穀小兒撾蔬
歸作粥阿翁飽去摩挲腹柿葉濃陰對黃犢快活一生
甘碌碌君不見秋崖白頭守殘牘麥雖熟飯不足

其二

不如歸燒痕青青春蕨肥茅籬數掩山四圍有秫可釀
荷可衣世間何地非危機曷不長守西山饑君不見秋
崖醉眠釣魚磯六年不出山下扉不如歸長安道上煙

塵飛莫向山家怨落暉

其三

呂望非熊亦非龍後車載歸作三公
龐眉皓髮八十翁
幾何日月土一叢
盍不徑老磻溪風
以文見醫方自功
西山之人不爾容
君不見秋崖無才終
不逢長年垂釣
煙波中公非熊同不同

無寐

雨寒不寒苔蘚紫
霜落未落楊柳黃
野鷹飢嘯獸擇肉

邊馬戰摧烏啄瘡兵氛甚惡寸心折劍無恙雙毛蒼極
知三百六旬氣月短其奈二十五點更漏長

胡道士山房聽琴

石亭老入維摩室三尺流泉長挂壁雲寒夜半山鬼號
十年兩耳秋蕭瑟村溪水落尋山房顏如渥丹鬢未霜
麻姑大鵬不勝載挽住且與歌滄浪菊近重陽破青藥
猶帶潘郎舊風雨彈冠政自不須彈我欲挂冠神武去

聽琴

寧食三斗塵不受緩歌雙黛顰寧食三斗葱不受急管
融春風吾二三子相知心平時比之雙南金扣門剝啄
倒屣出喜我謂我山水淫牆頭呼酒意頗急何以侑之
霹靂琴太虛為室月為燭悠然此意無古今山空江靜
夜如水但見四岸花木深大聲久不入衆聽誰復好古
同風襟自非我輩但癡坐噲等之俗難砭鍼

東西船

昨日東船使風下哭過未興快於馬今日西船使風上

適從何來急於浪東船下時西船怨西船上時東船羨
篙師勞苦自相覺明日那知風不轉推篷一笑奚爾為
怨遲羨速無休時沙頭漠漠杏花雨依舊年時檣燕語

丫頭巖

君不見新婦磯女兒浦小姑嫁與彭郎去天開地闢本
何心以邪見我成疑誤風煙高並雙丫石舊已知名今
始識佳山要自勝佳人未見好山如好色滿壁題詩吾
所恥倒激西江誰與洗安得人間馬長卿盡作山中魯

男子

用佚老園叟韻簡直孺併寄園叟

趙君規模要名世徐君人物南州穉欲攜老硯共研水
梅花不許山礬弟今年識徐如識春未識佚老園中人
似聞竹外一溪碧天與隔斷俗子塵此詩到眼情已浹
吾曹終與常人別不然持問溪頭雲渠自容吾分半榻

題高皇過沛圖

芒碭真人赤龍子一劍入關秦鹿死黥王蒞醢過故鄉

仍冠竹皮相爾汝故人父老喜欲狂至尊含笑袍花光
酒酣擊筑自起舞歌聲悲壯雲飛揚此意今人棄如土
豈但當時沐猴楚君不見相如草檄西入秦蜀山憔悴
生煙塵

諭俗

稻壓田塍穠頭重蛟蛇糾蟠扶不動得霜欲老晴下鎌
捲野秋雲堆作隴昨日糴米如糴珠頓落半價多年無
賣刀買牛政不惡一字入官妨爾樂不如阿婆殺雞賽

田神阿翁買酒邀田鄰三盃徑醉客歸去茅簷曝背溫
如春

觀漁

林光漏日煙霏濕鷓鴣族立春沙碧湘竿擊水雪花飛
鷓鴣沒入春溪肥銀刀撥刺爭三窟烏兔追亡健於鶻
搜淵剔藪無噍類餘勇未厭心突兀十五五斜陽邊
聽呼名字方趨前吐魚筠籃不下咽手捽瑣碎勞爾還
嗚呼奇哉子漁子塞上將軍那得爾

扣角

東家打麥聲彭魄西家縑絲雪能白中間草屋眠者誰
不農不桑把書冊書中宇宙三千年凡幾變滅成飛煙
不知讀此竟何用蓬蒿挂逕荒春田東家麥飯香撲撲
西家賣絲糴新穀先生帶經駕黃犢扣角前坡煙水綠
次韻採菌

秋崖不慣大官肉雪屋為出齋房芝山靈頗憐世味薄
風格略與詩情宜松牖何但退三舍巖拳恨不同一時

自尋墮樵了幽寂豈料枯枿能神奇羣僊餐霞吸沆瀣
豪貴蒸乳盛琉璃磚爐石鼎煮飛瀑此妙勿令渠輩知
題刊字蔡生

六經四十三萬字古未版行天所秘魯纔得見易春秋
書到漢時猶默記不知何年有爾曹誤我百世惟寸刀
日傳萬紙未渠已宇宙迫窄聲嘈嘈一第竟為吾子恩
辨筆如椽補龍衮生母謂我不讀書待檢麻沙見成本
才老致木犀甚古

老桂枯寒出奇怪知幾何年如許大枝枝渾是好西風
粒粒中藏香世界幽人高卧岸蘚邊野僧肯寄溪雲外
兔驚玉杵夜丁當鳥嗽辟寒金瑣碎併令滿屋書傳香
喚起多生酒詩債我今回向語一則云何讚歎花三昧
月光童子妙莊嚴金粟如來殊勝解

書夢

君馬黃我馬白漠漠柳花飛送客我馬跑風欲人立紫
絲袍貼黃金勒輕衫一騎後者誰黃初平家寄書信泥

香兩車饒外孫人與霜蹄俱夢境嗚呼人間兒戲亦前
定奈何夫人不知命

春盤

壬子

菜服根鬆縷冰玉萋蒿苗肥點寒綠霜鞭行茁軟於酥
雪樹生釘肥勝肉與吾同味焯絲辣知我長貧韭菹熟
更蒸狔壓花層層略糝鳧成金粟粟青紅餽釘映梅柳
紫翠招邀醉松竹擎將碧脆捲月明嚼出宮商帶詩馥
賜幡羞上老人頭家園不負將軍腹人生行樂未渠央

物意趨新自相續五十三翁日落山三百六旬車轉轂
不妨細雨看梅花且喜春風到茅屋

題訥齋

世人但識三尺觚儀從秦橫竟誰是瀾翻口角欲懸河
秋崖聽之歸洗耳萬言萬當不如默視吾舌存政須訥
雲根手築月三間是非付與西山笏謂君為訥耶讀書
夜寂聲琅琅謂君為辨耶向人開口無雌黃屋頭自有
山如此說易說難那用許孔堂絲竹春風和賜也多參

惟一唯

掃蜜

須蜜之人去其國盡以族行無敢逸綴如垂瘤大如囊
低壓山墻於我室秦人逐客真少恩客來須看春正酣
咄嗟已辦四山壁正對桃李開茅菴蒼頭奴解與之語
擁篲招邀聿來宇相攸新邑經始忙先作高臺奉盟主
沈沈夥涉之為王獨無揺毒之蠆芒熙熙登臺坐垂拱
花底退衙春晝長

九日寄汪澄甫

山雨欲雨不敢雨，停杯待與黃花語。
東籬人去幾何年，坐想寒香足淒楚。
秋崖早賦歸去來，亦無茅屋荒蒼苔。
淵明不入督郵眼，世俗寧有吾曹哉。
綠尊索共紅裙飲，却恐黃花不渠肯。
白衣未至酒餅乾，此意悠然要人領。
題曹兄耕綠軒

煙蒼蒼，水茫茫。
鵲鳩喚雨，蓑笠忙。
春泥滑滑，蒲稗長。
駕犂叱叱，牛力強。
高田低田，齊下秧。
隔林人家，吹黍香。
有

來饁者雙屨忙煮芹燒筍各有將小休吾牛飯前岡共
洗老瓦沽村場相與醉語墻下桑此為幽詩第幾章轉
頭擺耜秋風黃嗚呼吾人讀書政如此諸人讀書不如
睡君不聞建隆聖人之玉音者也之乎助何事

書樓考甫梅花百詠因徐直孺寄考甫

以詩鳴者累百輩誰與梅花可相配只傳冰影月香詩
直到如今美無對踈籬把住橫斜枝了不肯受春風知
自非冰腸雪洗髓向渠正爾難為辭恨君不識林和靖

雪汙西湖老孤詠恨我不識樓考甫角聲吹殘霜月苦
兒曹但賞瓊瑤句持與梅花相爾汝夜深不道瑣窓寒
浥盡花香花有語

次韻劉簿觀雪用東坡聚星堂韻禁體物語

江臯黯黯飛雲葉淅瀝破窓鳴急雪亂飄密灑寒正苦
低唱淺斟癡亦絕凍吟可但筆鋒健醒狂不覺屐齒折
留連急景聊從容俯仰幻塵空變滅舒眉一笑各雲散
轉眼百年如電掣風凝光眩眼欲花酒帶潮紅臉生顙

劇誇陶語何區區等與謝吟爭屑屑醉翁出令凡馬空
坡老揮毫風燕瞥兩公仙去各已久一代風流尚誰說
吸鯨今夕不可辭醉中有句錚如鐵

三虎行

黃茅慘慘天欲雨老烏查查路幽阻田家止予且勿行
前有南山白額虎一母三足其名彪兩子從之力俱武
西鄰昨暮樵不歸欲覓殘骸無處所日未昏黑深掩關
毛髮為豎心悲酸客子豈知行路難打門聲急誰氏子

東蘊乞火霜風寒勸渠且宿不敢住袒而示我催租瘢
嗚呼李廣不生周處死負子渡河何日是

送少卿奉使淮西

北兵據城堅如石北人入關平如席秋高塞上沙草愁
夜半軍中羽書急符麟留鑰漢宗姓風鶴為兵謝安姪
貌貅野宿日增竈鼯語陸梁夜鳴鏑肯攜金印問錢穀
盍上玉堂調筆墨時平書生坐迂濶氣蓋廷臣工激直
煙塵所喜毛髮青冰雪其清肝膽白朱雀橋深橘香美

白鷺洲寒荻花濕我所思兮丁令威欲往從之語胸臆

排門夫

一家一夫排門起五家一甲單出里夫須襁褓潦霧愁
與官輸木供邊壘沙場草青敵運衰軍書抵急飛塵埃
官須排杈二十萬巖邑配以三千枚黠貪分頭按掌唾
田里寧容高枕卧望青徑指三尺墳踏白邀為萬金貨
殘爾冢爾勿嗟爾行取金錢寧爾耶小人所憂在一飯
政坐爾冢殘吾家待吾舉火者百指母已癯病兒垂髫

社朝浸種亦已芽秧田未翻生薺花吏呼勸農今幾日
典衣已供塘塲卅九年回首奈若何夢遶江南與江北

霖雨

朝雨暮雨不肯晴昏昏冥冥如翳塵舍中連月汗流礎
道傍前日泥埋輪東南地傾水所滙潮汐沙擁江之湄
埧頭中沙坐可想往往政與洪濤瀕陵遷谷變不知代
但見萬瓦差鱗鱗老錢試手建都邑蓋亦安土非經綸
海鹹烏鹵易嵐霧況此梅蒸天網緼沮如與吾類鼃黽

爽塏久欲還麋廬因思吳趙寧愛此適已灞上翔真人
當時倘匪地天泰詎知無意雲雷屯

題司理采芙蓉圖

紉之以湘纍秋蘭之珮載之以剡溪夜雪之舟漱之以
清水寒露之壺澆之以碧玉晴雲之甌著童船尾書船
頭荷花浦淑雙飛鷗新紅如洗雲錦稠停撓竚棹香浮
浮薰風滿座涼颼颼醉面欲醒誰相釀若有人兮眇中
洲把住月老叫不休花亦問月愁不愁何以了此簫葭

秋蛟宮蛟宮夜泣悲靈脩鱗幢欲濕行雲留楚騷如水
不可作此意難以筆墨求蕩予漿兮涯之幽

中秋

月出未出山蒼蒼明毫倒射生寒芒光搖林彩已奇怪
月時猶在青山外一杯兩杯呼出來仰天喝雲雲未開
冰輪碾上何人推天涼如水青如苔不知今我何如哉
冰撐雪拄胸崔嵬欲飛上天顛斗魁手取蟾蜍探潑醅
醉眠老兔秋毳毼下視茫茫青作堆今人不見古時月

古月長照今人哀
繇來今古一丘貉
安用老滴成瓊瑰
如此佳月能幾回
搔吾髮已霜皚皚
李白如在三百年
與騎鯨魚游九垓

謝兄編言仁求詩

孟子言仁惟一
字曾子言仁惟一
唯風霆霜露天何言
吾夫子言非得已
六經在天如北斗
尚多不經聖人手
杏花零落曉壇荒
各自蜂房開戶牖
屋下架屋樓上樓
不三萬言渠不休
夜寒一燈供掉頭
泓穎何罪雲煙愁

阿連夢中春草碧更向那邊添一筆吾哀甚矣將奈何
欲共君談口荆棘

木稼

春日電光飛霹靂元日奇寒雪盈尺銷瓊融玉夜色凝
鬣鬣穹林矗矗僵立鮫人淚滴珊瑚枝通身擎出青琉璃
霜皮溜雨凍不解無人報與春風知曉光穿漏晴相射
銳士銜枚甲初卸山人不讀五行書未省木冰吁可怕

用王侍郎韻寄題醫僧道森藥山閣

蟻蛭侯王空培塿大千世界無何有癡兒不省芭蕉身
持與冰霜鬪長久三生慈愍魚十千却來世間吁可憐
一百四病更相纏縱有佛力難言詮不如一念圓覺淨
四大乾坤無可病雲根靈草自春風夜立齊腰山雪盛

田園居之右闕小室曰耕雨醉題壁上

南岡北岡鳴鵲鳩高田低田俱怒流一簑煙雨駕鰲鯨
老手猶在吾何憂燈火半生書作崇幾欲送窮窮不去
吁嗟先生誰使汝苦要革革換雙屨如聞雙屨得有辭

向來棄我君何之百無一成唯忍飢胡不爛煮秋崖詩
歲晚相期亦不惡莫更將書累牛角併煩說似下邳侯
爾輩方當束高閣

鄭總幹致蘆管筆

中書采邑初管城笛材飽霜搖綠雲春煙落紙黑蛟瘦
不可一日無此君九華真人出奇計笑指秋江雪無際
并刀失手劉寄奴爨餘得與詩為地雙鉤入握如虛空
飄飄輕捷翻羣鴻翰林夜召陶學士草制進封盧國公



秋崖集卷十四

欽定四庫全書

集部

秋崖集卷十五

詳校官起居注主事臣顧宗泰

主事臣呂雲棟覆勘

總校官進士臣朱鈐

校對官中書臣高中

謄錄監生臣施華

欽定四庫全書

秋崖集卷十五

宋 方岳 撰

詩 七言古體

次韻題秋崖

秋崖何嘗與人絕渠自胸中欠風月齊雲落星吾所無
草木深幽終是別桂花正開山氣清人間無路爭崢嶸
虛皇借與廣寒住夜半擬進秋風行芙蓉作城花露惹

一片月明天下風前把杯和月吞嚼出新詩不供寫
醉倒寧知酒戶慳滿身樹影蛟蛇蟠羣僊挽我便歸去
雲海翻濤毛髮寒

次韻謝從之以表間投贈

長楊奏賦三十年已甘老死窮山巔醉眠獨宿秋風前
此豈有意聲名傳如鴛伏櫪不受鞭要與腰褭難爭妍
強令作對官道邊功名畢竟誰新鮮岌岌兩傍蛟龍纏
侯曰美哉豈其然才當如楫航長川冀牆空復煩雕鐫

表閭不靳少府錢粉飾休盛期半千寧欲老我寒詩肩
歸來歸來直如絃蓬萊回首慙班聯安用一鳴諸子先
登樓忽思王仲宣不如傍家田一廛鋤煙犂雨仰問天
天生盤谷容盤旋更有斗酒相留連焉能跼跼愁墮鳶
一單堅坐三條椽

次韻山中小集

一生大錯空環轍何啻縻渠六州鐵不如歸來乎山中
山泉自香山酒列冰蘂一罇累數觴山中之樂那可量

梅花在傍具知狀落筆煙雲生草堂雪意催詩闕清絕
與巧而遲寧速拙豈知世上多路岐莫遣胸中少風月
酒酣耳熱鬚髯張老夫無復當年狂乾坤許大不欠我
春猿秋鶴聊徜徉

醉歌

勸君且盡一杯酒身外無窮莫問口近聞誰直白玉堂
或傳某佩黃金斗與君何干於我奚有不如雨話耕夫
煙呼釣叟問竹活無看梅開否天下事自有夔龍人山

中居只堪麋鹿友乾坤蕩蕩呼不聞今古茫茫骨俱朽
雞催晨兔沒西春風來時又花柳不知柳今幾青花幾
紅但見吾人成老醜吾欲采薇西山播穀南畝吾牛雖
健吾衰久只可茅柴火酒醉幾觴村田樂詩吟數首不
然空山寂寂白晝長閒殺一雙無用手

田家樂

前村後村場圃登東家西家機杼鳴神林飲福阿翁醉
包裹餘胙分杯羹婦子迎門笑相語慙愧今年好年歲

牛羊下來翁且眠時平無人夜催稅

田家苦

六月之雨田成溪七月之旱煙塵飛眼中收拾不十年
未議索飯兒啼飢夜點松明事治穀規避債家相迫促
平明排闥自分沾渠更舞權還不足

豆苗

江南之筍天下奇春風匆匆催上籬秦郵之薑肥勝肉
遠莫致之長負腹先生一鉢同僧居別有方法供齋蔬

山房掃地布豆粒不煩勤荷煙中鋤手分瀑泉灑作雨
覆以老瓦如穹廬平明發視玉髯磔一夜怒長堪水菹
自親火候淪魚眼帶生毛入晴雲盃碧絲高壓涎滑蓴
脆響平欺辛螯燂晚菰早韭各一時非時不到詩人脾
何如此雋咄嗟辦庾郎處貧未為慣

月中觀梅

江南地暖得春早老眼觀梅嘗草草今冬最暖春最遲
忽憶誠齋南海棠解道晴暄殊欠寒城中未有梅花看

却入山深最寒處雪照冰溪繞一樹乃知山中人不受
人間塵寧使風饕雪虐寒到骨轉寒轉有寒精神荒屋
之底野水之濱太虛為室天為鄰只有明月情相親一
團不冰今夜月一片不飛今歲雪雪意自怕老夫寒月
意寧知老夫拙呼上山來強索詩一花兩花春未知南
枝儘遲遲儘奇槎牙不要東風吹酣晴釀日付桃李定
自不肯君同時舉杯吞月和花嚼月自寄胸花不覺少
焉花亦到胸中各自去尋詩約莫

雪中觀梅

一冬妍晴春意早微茫已到閒花草山翁平生見事遲
未緝牛衣編稻藁明日是春那得寒玄冥不作尋常看
交割與春排當處萬里瑤林列銀樹茅菴有詩人肺渴
方生塵不知誰何駟六蚪兮上天作樂府落筆殿前如
有神帝咨汝岳錫圭土佚以寬閒之野寂寞之濱玉田
界天旁無隣有梅百本為賓親昨夜枝上猶是月今日
枝上渾是雪春工未必辦此奇縱使巧遲寧速拙雪詩

不當梅花詩詩成合報孤山知老逋醉眠呼不醒霜竹
付與何人吹古聲久不入俚耳有詩寧似無詩時自撼
枝頭供一嚼了了此心清淨覺謂為梅又冷冰冰道是
雪來香莫莫

又和諸公作雪月歌

月觀夜午雪觀早酒興崔嵬詩潦草梅花在傍具知狀
喚渠收拾秋崖藁月邊雪邊同一寒詩成不許凡人看
年年月寒雪寒處老骨槎牙倚枯樹不知天下人面有

三寸塵政使書癡傳癖猶可憎而况無風無味之錢神
麾之門外問諸水濱非我不與相比鄰渠自胸次不我
親千古萬古赤壁月千古萬古剡溪雪天荒地老方可
人當日人曾笑渠拙有梅不可無吾詩無月無雪無人
知梅花亦不用收拾付與萬竅更相吹雪如瓊瑤月如
水青山白髮時乎時有薇可羹螯可嚼此味勿令兒輩
覺四海諸公共往來雪中與渠無適莫

山中甃墳外弟程魁有詩次韻

咄哉人世如飛煙強欲作計垂千年寧知鬼見拍手笑
曾不一瞬雲埋阡我於浮休等無二詩卷留與荒山巔
平生夢想所不到六國相印二頃田古今一死百事足
安用老刻青瑤堅海棠作堵錦步帳柳花糝徑拳毛羶
見成林壑伴茅堂名付身後杯生前山中物物各生意
春到豈論茅與荃人情變態千萬狀所不負予惟老天
白虹貫巖出奇怪一鍤不費青烏遷是事且寘勿復道
老子久矣宜蚩妍

寄題龔國錄見山閣

吾州百嶂千峰低斗大山城去山咫紫青繚碧玉四圍
曉色蒼寒莫煙紫山中見山何足奇此妙未容兒輩知
諸方不具頂門眼寧了芥子藏須彌我曾風月堂西醉
鞠草離離敗人意摩挲龕壁幾屏篁誰破天慳出嵐翠
恨我不識今楚龔丘壑可想崔嵬胸鑿開埋雨三三徑
跳出撐雲六六峰騎鯨老僊滴詩硯元氣淋漓冰片片
翩然下視世間人對面有山渠不見

憎蚋

火雲燒空無處避深入山林屏幽翳松聲竹影差可人
高枕石頭眠薜荔矇鬆欲墮無何鄉竒痒爬搔紛芟製
翦翦黑子着兩股劣視焦螟何瑣細蒼頭在旁具言狀
謂特可憎是為蚋晝飛夜息繁有徒胚胎鬱蒸育蕪翳
使彼為虺蛇之螫則已焚於伯益之焚惟其一蚊之睫
有餘棲九牛之毛不足計故雖離朱莫覩其翼而善飛
觥俞弗聞其聲而工噬蓋天地萬生其么麼微眇未有

爾若者而小則抓麻姑之爪甚或疥瘍醫之齊豈非族
雖微而猥多形易潛而叵測吁嗟先生歸休乎物固有
時姑小憩蚊蠅蠓滿乾坤可奈渠何苦攘袂一葉秋羣
動閉衲何之兮豈其殪先生於時融融洩洩半枕風清
千山月霽

義雞行

西家粥粥雞將雛俛啄蚱蜢行相呼羽毛未合事紛奪
四顧不虞烏畢逋翻窺捷取血丹吻性命須臾那可忍

草深決起落東家垂翅離披猶蠢蠢東家司晨乃有雄
平時背距凌秋風怒冠趨前作雌伏以翼覆藉哀窮凶
初脫禍機驚未定生意中間不能寸時其饑渴經紀之
蹉跎梳翎蘇委頓物生知母不知父此雖其類非其侶
陳嬰杵臼義所激郭解朱家俠何取嗚呼人有不如物
嗚呼今固不如古從來山澤生龍蛇人間父子成豺虎

古人行

古人二十四已自取侯印加我三十一擁褐猿猱逕古

人三十六已自歎頭顱加我十九年雪領埋霜鬚春風
秋月五十五青山白雲自今古與其浮沈於不卿不相
之間孰愈自適於老圃老農之伍休休休仰面看人吾
所羞莫莫莫天下事堪幾回錯既不能致君乎唐虞又
不能收身於樵漁提攜手板聊復爾安用局促轅下駒
昌黎老韓手筆大光範三書看渠破號天叫地為一官
宰相須還賈耽做不如荷葭塢中之把茅卧聽松聲三
峽濤開門夜半劃長嘯坐笑古人山月高

元日立春

糟牀夜壓真珠紅，摩挲醉面迎春風。
春來春去無終極，能費幾筋蔓菁松。
既無長繩可以繫白日，又無大藥可以
以玄雙蓬。何怪乎玉雪可憐之孺子，忽
頽然風霜不貸之衰翁。
百年長短一丘貉，曾不芥蒂崔嵬胸。
若夫塞翁失馬，楚人亡弓，此事細甚。
焦螟同使吾冠冕，佩玉於廟廊之上。
吾不見其為泰，使吾披裘帶索於嵌巖
之下，亦不見其為窮。諸賢自作世俗眼，
此老日飲亡何中。春秋

獲麟夫子沒本草不自醫神農著書萬古知何用況復
起草明光宮我今併欲焚老硯一簑鳴雨東臯東

檻虎行

風低黃蘆雪模糊南山夜獵生於菟鐵衣檻致元帥府
猶自舐舌磨牙須府公起迎自除館刻桷丹楹齊柵斷
分棟驍雄上下番汎埽蠲明節寒暖一鋪兵十人一飯
肉十斤日費少府如千緡惟恐不飽撩怒嗔一旦出桺
誰能跼君不見有尢信信守門戶舐糠纍纍奈何虎

閱視賞射

邊角悲鳴霜撲地將校寧甘潑寒戲熊旗引隊柳營曉
大羽插腰生意氣虎皮半捲并鐵刀臂鞬蜀錦圍鵬袍
士不敢喘那敢驕肅聽號令惟所操然絃唾手試弓刀
例物角花金碗的左軍右軍分兩翼簇簇飛星點紅礫
一麾白羽人肩摩三軍歡踴聲鳴鼙教頭喝賜誰最多
鐵絲箭者無以過大風飛雲歌漢歌安得一箭開關河
漢家君王自神武邊頭將臣如卧虎覺吾目中無此敵

待射狼星靖九土石崖天齊勒碑頌那知援筆無燕許

呈和仲

何須不踏東華土何須不吃吳山水同時輩流半霄漢
徑上銀臺披鳳尾幾曾禮部奏第一十載青衫百寮底
相公之甥逕甚捷頭放稍低那得爾直不虎闕非狂耶
胡不愛官幾歷詆吏銓教授古括州管領風雲二三子
孔堂絲竹秋雨荒絃誦琅然頓盈耳深夜楚楚有古意
相對青燈夜分語六鼇雲海渺何許寶字森羅風日美

人言欠渠揮翰手倘及春江戒行李寒氈對客澹無欲
清夢不勞曾到此談經歸來喜津津手洗翠缶香傾銀
何以娛子白髮親梅花中有無邊春

送童子盧觀國試玉堂

長亭柳色驚兒黃花事欲動春風香佩觸徑趨白玉堂
淋漓翰墨孤飛翔黑頭相公紫微郎金貂玉魚垂兩璫
攜立螭陛穿鸛行至尊龍飛御明光催班賜見清蹕長
天顏喜動絺繡裳官花綾織雲錦章殿前拜舞藉奉常

跨馬入省繙縑緗讀書靜珠琅琅風日不到蓬山傍
文字零落冰雪腸要令汗竹俱流芳子豈不見晏與楊
銅根鐵幹森秋霜萬牛挽之供棟梁

次韻汪卿

霜洗梅花春滿握夜寒吹老城頭角瑣窓硯作離騷香
吐句不教花莫落裁量要是修月手我欲追隨慙筆閣
平生萬事不挂口愛詩苦未厭溪壑有人肯築風騷壇
敢不束甲三距躍當時只料孤鳳凰不與雞羣同抱啄

拔旗趙壁決此勝金鼓俄驚自天落一嗔縱得馬辟易
已覺楚歌聲四薄夜光明月以暗投心甚愛之顏有忤
公詩端似大國晉王帛諸侯賴聯絡倘令吳楚主夏盟
獲麟正恐春秋作歙州雖小水如練漚鳥亦知文字樂
此盟定自不可寒把住梅花更商確夜窓或許時過從
莫問聖清與賢濁

次韻曹宰聽舅氏彈琴

有客夜鼓龍門琴風露漠漠侵秋庭妙彈幽響落指外

此意難以兩耳聽參橫斗轉四山寂但聞別鶴之夜怨
離鸞之晨吟欸音誰適鳴滄浪延緣葦間情盡傷忽然
浩歎聲軒昂二十八宿俱韜藏少焉月出流寒光但見
山蒼蒼兮江泱泱爾乃春容大篇寂寞短章謬攸一笑
天所吝亦恐此樂不可常吾當為君譜入渭陽操莫彈
履霜似傷孝碧桐翠竹夜生寒折楊皇華何足道人生
百年幾今夕我思古人心忽忽黃金擬鑄鍾子期此言
每墮槐安國

諸公賦翠毛筆因次韻為羊毛筆嘆

鬚參草卧殘陽浦拔毛竟作文中虎金華化石久已陳
玉署摘辭疾於羽醉猩者酒少道勁狡兔飽霜工媚嫵
磔殘鼠鬚肯收錄剝落雞毛誰比數文章諸公多好奇
往往得名專翰府乃知草聖不世出罕識公孫大娘舞
君不見華元分羹奇禍作糜身鼎烹竟無補又不見晉
宮灑鹽兒女曹憤鬱令人噤難吐物生正係遭不遭敢
向詞林嘆辛苦椽書大硯如南溟吾其鵬乎爾鸚鵡

僮有彈鷺寘池上者予解其縛縱之而不去蓋
不飲不食拳立而不徙者七八日作詩返之故

巢

煙藤幕幕驚蛇蟄雪羽飛飛羣鷺集相筱抱子林欲深
經始營巢茅未葺銜枚適與惡少逢落彈不虞奇禍及
毳殘玉點偶賒死頸曲銀鉤竟遭執急呼解縛縱使歸
胡自拘囚長竚立白蘋久失鴻鴈洲紅豆不窺鸚鵡粒
申胥併日負秦庭莊舄愁吟思越邑云何垂翅但摧顏

豈欲言情輒於悵子其休休勿介介山曰歸哉寧汲汲
放之雲壑卧蘿蔦期以春臯伴蓑笠臨去一語更丁寧
從此謹毋輕出入

陶倅母夫人挽詩

戴君手持黃卿辭邀我為作陶母詩婦言婦德不出梱
縱有令則何繇知崑山生玉草木潤欲識其母觀其兒
一經科目摘髭易五丈夫子皆環竒黃卿與世少諧可
老筆為寫青琉璃慨予一讀淚如洗酸風淒斷漳淮湄

往年將父問里舍病痲中道驚相持秋山黯慘過縣尹
取急欲謁誰何醫天方罪予不孝子行未半驛翁跼危
雲崩日落竟千古永始此路行無期爾時縣尹有母遺
鮐背兒齒當期頤潘輿佳日訪桃李一舍而迎聊遨嬉
人間僅僅幾寒暑亦已犇月歸何時暮雲春樹渺千里
同一哀痛難平治此詩莫遣挽郎讀天荒地老松風悲

次韻徐宰三雪

春其幾何到端木三信東風銀粟粟眼驚天地有奇事

喜不自持詩陸續爾時茅屋亦堪畫有竹寧甘食無肉
多年裋褐夜不暖紫鳳天吳共伸縮袖中書冊字蠅頭
略借瑤階明月燭忍飢未慣願歲豐口雖不言以心祝
一生懶作貸米書自汲溪水煮溪菽荷鋤久欲眠秋雲
飛翰誰驚落春瀑人言安用管城子家本田家一犂足
分吾此雪謝老天高吟信手三千牘蟄雷之腹庶其飽
殺氣猶纏當肅穆彼姝者子羔酒融夜寒斗帳金花麝
何如石鼎鳴澗松風味之高未渠慙先生堅卧袁安廬

正坐不能甘鹿鹿纔晴便欲出畦麥止可掛書騎健犢
脫蓑許過宓賤堂金杯亦眩淵明菊清談吾獨為詩耳
卷軸今如春筍束我所思兮孤鳳翔欲往從之老鶻禿

再次韻因索紙筆

誰何扣門聲啄木踏雪逢迎寒起粟詩筒過我捷於羽
墨滑豈供貂尾續雲鏘孤響落瓊瑤頓覺聞韶不知肉
膽驚強韻婁吐舌春溢長箋手幾縮鈍根難除撚髭苦
夜凡晶熒殘幾燭管城子老免冠謝久不中書三致祝

擇交正自欠楮生兩窮相值聲藪藪端凝賴有弘農陶
時一浴之雲外瀑山寒亦聞泓有語未致兩生長不足
誰其下榻徐孺子不以寒暄事竿牘徑須回施作詩供
縱使長貧顏有穆書生得句如得官無以藉之眉為蹙
雲煙蠟紙生踴躍涕唾犀毫負慙慙倘非渠輩稱揮洒
未見無虞堪即鹿殘風剩月幸見分卷軸今當汗駒犢
夜窓賡載有餘暇牋注離騷到蘭菊雪鋪玉箋烏絲欄
一一手抄森似束毋令千載韓退之作傳譏嘲老而禿

三次韻答惠蘭亭紙翠毫筆

半生書癡蟲蠹木不管餅無舊儲粟青燈竹屋雪村寒
聲鳴益悲夢難續晚菰早韭有書味詩腹冰清鄙梁肉
邇來毛穎會稽楮乃欺余貧共羞縮夜深磨墨訴石平
五色榮光隨下燭窓間錯落驚暴富每見兒曹輒相祝
奇牋勿污寒具油玩弄其母當有較觚稜古瓦亦懽喜
春浪生池含雪瀑霜毫世輩何多耶向者心期一夔足
吾生但識鼠鬚健未省禽魚堪汗牘重綈十襲不敢吮

誰作猗那頌於穆最憐長安驕駃兒翠毫入手春山蹙
平時作葉供媚嫵拔羽詩書豈吾恧何知梳洗曉鬟綠
解出文章排五鹿策勛翰墨玉牀籍未羨香車駕金犢
如聞六宮今弋綈釵梁不飾黃花菊細鈿高朶花為筆
創巧寧知誰縛束吁嗟文采信為累莫拯多生羽毛禿

黃宰致江西詩雙井茶

黃侯授我以江西詩禪之宗派淪我以雙井老仙之雪
香磚爐春著兔毫玉石鼎月翻魚眼湯夜窓搜攪十年

讀侯蟲鳴秋聲殷牆乃翁詩家第一祖不用棒喝行諸
方掀翻杜陵自作古夜半衣鉢誰升堂單傳橫出二十
六未許歛梅洪鴈行雅聞滕閣藏墨本欲往從之山阻
長牙籤大冊忽在眼荒苔茅屋森珩璜東湖柳色入眉
宇君其幾代之諸郎不離文字話祖意傳燈肯與留山
房寧知三生受昏闇縱有此燈無此光宜州戍樓山月
苦茫茫參到無何鄉

合紙屏為小閣畫卧袁訪戴其上名之曰聽雪

各與長句

空山十日雪塞門天荒地老無行人蘆花敗絮不堪着
山石夜裂蒼皮皴竒寒中人僵顛屨樵汲路迷瓶粟既
駕風萬鶴危欲仙此腹久無煙火氣家家暖入紅麒麟
誰肯問訊推柴荆洛陽令亦可人者惜哉史不書其名
此公要亦非知我志士從前例寒餓倘令開口向凡兒
寧忍春雷曲肱卧

其二

颼颼颼風落木淅淅瀝瀝聲撼竹乾坤不夜起開闕
一港玻璃四山玉我所思兮渺中洲幽懷欲寫誰與酬
世間餘子不足語乘興徑上漁翁舟未到山陰竟回棹
歛去驟來何草草神交如必面相朋逸韻高情一如掃
寧可一生無此人不可一日無此君襟期何必戴安道
玉立寒青自不羣

題董一之花木抄

君不見王子猷剡溪夜雪之孤舟此翁百好不入眼而

雅與竹深相投君不見陶淵明徽絃不具之古琴東籬
把菊偶然耳人或作圖傳至今吾何曾識董一之於此
略已心相知事治好春繞菴屋豈有俗子能爾為江風
山月無盡藏時一吐出胸中奇與茶作經花作譜銓次
衡若蘭蓀離秦碑晉帖了真贗硯石錯落書參差邇來
抄注到儕友唾視錢癖何人斯長卿但有四立壁無一
持贈長嗟咨煩為傳聲語花草倘可千里同襟期吾聞
奇章公石李成畫在廬九老湘九疑煙雲渺綿不可狀

世乏佳士當歸誰君其持以問太空所不與者如此詩

次韻徐宰雪句

雪花飛盡江頭蘆秋崖有屋窓未糊嗅梅自可了孤寂
燃竹相與留須臾傳觀玉帝整嚴衛雜沓環佩紛前驅
夢隨姑射扣瑤陛身入閭闔排銀鋪明毫一色寶階淨
端木六出瓊林孤綠章封事見名姓白霓仙子軒眉鬚
乃知天喜愛民尹分此雪與耕田夫山川盡入古圖畫
園林已作春規模逢船誰可載書共松醪未擬炊書沽

金僕姑寒憶戰士玉玲瓏煖無歌姝煮茶安用碧跳脫
眠蓑自勝紅氍毹盟鷗久與說心腹買犢大欠耕膏腴
頻年歲入少生計何日詔下蠲田租甌塵但憂脫粟飯
甌滑未議羹羹鱸羣公豈堪立仗馬賤子只跨尋詩驢
第令吾民不知餒如彼蔡人何足誅衝寒索米徙者衆
啼饑載道攜其孥邊烽有警事方爾民瘼未軫天地無
轅門誰曳丈二組羽書夜下尺一符少遲獸獮渤海盜
當復蟻浮高陽徒平淮有碑倘須刻筆墨可但唐宗儒

趙丞饌酒蟹獐巴

公子無腸秋滿殼山吏無魂飽霜獐寒浦醉骨糟丘臺
鳴鶻數肋凌煙閣故人斜封三印紅秋江已在吾目中
角聲喚起邊城夢雪岸打圍蘆荻風

元夕病中

家貧近市常喧啾燈夕無燈冷於水罷參法喜深炷香
示疾維摩低隱几梅花相親不余負酒盞成踈竟誰使
一生甘作癡凍蠅百方莫趁追犇螳頗聞捷奏箭飛書

想見昇平花作市醉吹笙篴舞蛾眉春入鼓輦騰馬耳
落釵教盪少年事彈缺悲歌游俠子寧種松風眠隱居
自斲芝田食角里掉頭塵土誰枉尺過眼紛華不盈咫
吾生如月浪中翻人情得蜜刀頭舐內觀各自普光明
頗悟中生大驪喜統如三鼓雨聲寒睡思正濃姑舍是
次韻謝兄饋李

往事轉頭如墮甌獨枕書眠知雋永竹窓風好直萬金
不涉世間榮辱境東山之屐北山移坐覺室邇長相思

碧脆已冰烹伏雌未害踏雲來話詩

非瓊花

舊傳瓊花無與雙專奇擅美名此邦江南清夢入詩府
安得一念令心降去年騎鶴揚州住斗酒屢眠雲霧窓
月寒雪冷花未吐正爾俗葉凡株椿心期妙處在真實
不假羽節青霓幢今春訪花吾第一自折繁枝盛翠缸
橫看倒睨掉頭語前語後賦何其吮真珠碎簇玉蝴蝶
直與八仙同一腔聞名見面足笑党強為花辨幾愚蠢

有如巨賢雜羣小望而可識為奇厖陳餘張耳信相似
一等人耳無純老忠耶佞耶豈難別祝鮀不類闕龍逢
試持此論訊后土謂予不信如長江

再用韻酬朱行甫

夢中翠鳳飛來雙駕言后土遜名邦手持玉簡判紅紫
斂袂欲以詩城降粹容喜動日月角揖我入對玲瓏窓
為言瓊花返蓬閬下界久矣無根樁乃今存者賸本耳
補亡以紿青油幢人間識真蓋亦寡載酒嘉賓寧論缸

黃冠誕謫謹勿信傳訛聽舛其言唯為花作辨誰氏子
謬妄補入黃鍾腔耳庸目陋惑世俗其罪不能三赦慙
朱雲之孫亦奇士文有氣骨豐而龐謂瓊赤玉匪為白
不比俗論紛茸尤詩筒往來捷於響夜發嚴鼓聲逢逢
咨爾岳為謝此老壯哉寸管飛濤江

月下大醉星姪作墨索書迅筆題為醉矣行

吾醉矣吾醉矣醉語雖強難舉似何年開闢有乾坤日
月左旋如磨螳尊盧赫胥一聚塵檮杌春秋幾張紙道

家者流李老君儒家者流孔夫子等一浮名世間耳煙霏
霏冢纍纍青山良是白骨非欲呼古人呼不醒待呼得
醒將何如世情冷暖翻覆手人生短長屈伸肘安用黃
金印如斗君不見顏子白頭纔十九要與彭鏗骨同朽
天地荒老生古愁所不負予如此酒千古在前萬古在
後著我中間渺然何有亦知本是麋鹿羣那解人作牛
馬走白魚如玉紫蟹肥秋風欲老蘆花飛酒酣月落喝
便住螭虬蟠攫霜毫揮吾婦曰君醉耶吾姪曰非醉也

謂吾醉者固不然非醉亦非知我者花影滿身扶不起
此紙不知何等語明朝勿與醒者傳笑倒渠儂吾醉矣

戲呈君用

秋崖初無負郭二頃田向來耕舍寒炊煙負薪行歌遭
婦罵往往倒崖底之枯松煮崖邊之飛泉龜腸怒吼賣
牛具龍骨倒挂行蛄涎乃以農自目其然豈其然胥山
之窮固亦無一錢較之於我猶差賢白頭把筆耕六籍
芸人芸已皆逢年可曾腰斧響空谷但聞種之以弘農

陶耨之以絳人玄先生之號則不可北山久欲移文鐫
吾嘗觀諸朝左右分兩銓若使后夔降典夷作樂各違
所長非所便我今手招白雲與渠語兩易其任盟當堅
君農我樵萬山綠依舊司存雨露邊亦不必承明之廬
九入亦不必歲中之官九遷共披煙蓑拜新號疏駁不
到松風前爛柯扣角醉眠熟佳話留與山中傳

次韻劉簿寄示

塵世崎嶇天一握俗子追犇蝸兩角先生宴坐心平夷

矮屋打頭甘寂寞手提老筆挾霜氣合上蓬山直延閣
高人乃亦主簿耳往往胸中自丘壑銀鉤寶唾俱入妙
令我見之生踴躍日酣昨暮春睡濃柳外叩門誰剝啄
一書自直十從事況有驪珠光錯落風簷急轉百迴讀
花草愁深顏色薄放余許出半頭地未敢以信而以忤
譬如駑駘受刷飾金環壓轡青絲絡猗那清廟吁已遠
下里巴詞可無作候蟲鳴秋鳥鳴春美惡則殊俱自樂
焚香危坐試品藻頗亦敢言余論確公詩雖淡朱絃清

我詩雖雅黃鍾濁

次韻十二神體

鼠技易窮誰比數
牛衣政可眠春雨
虎窺九闕高莫捫
兔禿千毫老無補
龍嬰鱗逆事可驚
蛇畫足添心獨苦
馬寧坂下困鹽車
羊勿夢中翻菜圃
沐猴從爾楚人冠
荒雞寧起劉郎舞
狗監無煩誦子虛
豕亥縱分吾不取

其二

鼠穴不能容窶數
牛角自歌深夜雨
虎頭肉食飛者誰

兔窟趺居狡何補龍籍亦保終當還蛇杯生疑空自苦
馬曹誤我盍歸田羊羹禍人寧學圃猴拳巖嫩鮮可烹
雞毛菜香醉言舞狗尾時時遣續貂豕白獻慙吾不取
用王深造韻觀射寄呈吳門吳侍郎

吳苑雲酣歌舞地平時灞上真兒戲府公槌鼓入轅門
盤馬彎弓士增氣玉虬夜吼雙寶刀曉霜冷透宮花袍
君王有意敵天驕霹靂勁弦吾與操滿月猶嫌無腕力
三軍鳴金齊破的莫將電鋌驚飛翼請射檄書青草礫

參旗井鉞光相摩帳前萬疊轟靈鼉呼韓要通作編戶
勿遣喘從榆塞過鴈沙枯葉改凱歌安得壯士翻銀河
三邊農桑俱偃武將軍懶射南山虎不須土訓喻遠人
天地中間悉臣主文章四海吳狀元那肯軍裝遽如許
拔灘

大灘熬熬小灘嘈嘈石芒犖犖寧容刀崩洪斗落與石
鏖風聲悲壯波聲豪勢如萬馬之奔羣熊之嗥併船欲
上牽絳牢浪頭捲過船頭高篙工翻身齊刺篙蹈桅倒

挂如飛猱躋攀分寸相呼號一落百尺爭秋毫嗚呼行
路難如此若此出俗無波濤

海棠落盡次謝司法韻

花前誰與東西玉但遣能詩一夔足雨寒無奈雪飄零
酒醒却愁香陸續阿嬌深貯黃金屋阿環初出華清浴
騎鱸安得謫仙人宮袍夜醉金蓮燭

其二

海棠寂寂香埋玉山雨浪浪負歡足閉門長憾虎頭癡

對客不供貂尾續徑呼伯雅相拍浮試坐毛錐三沐浴
滿身花片為誰春政欠太虛明月燭

大雷雨

黑雲壓山雨如鏃霹靂火光龍起陸四壁淋漓風撼屋
一窓寒燈卧空谷龍乎龍乎盍歸來先生牀濕生青苔
未議青黃麥枯死古語更占春甲子

春暮

人生會有百年極春事略無三日晴豈惟坐隔海棠醉

亦未曾逐楊花行綠樹陰陰遽如許黃鳥飛飛寂無語
先生欲作送春詩似此一春那用爾

題義約

向來祈山赭如天邇來祈山翠如碧祈山草木皆精神
祈山人材方氣魄君不見癸丑諸賢奉親策武成殿前
天咫尺太微星動豹尾班祈山人作龍頭客所以天留
老子山之側為守雲煙護山碧山轉碧兮人轉奇未許
右科專此席前頭更有文狀元努力風鵬九霄翮

二禽

鵲噪令公喜鵲噪令公怒福兮挽不來禍兮推不去咄
哉之二蟲於爾竟何與茅簷新雨晴鵲聲嘆圓喙主人
顏色和甘諛終不悟禍常十八九鵲故告之故城頭尾
畢逋唾者滿行路佞鵲不我忤忠鵲不我誤試嘗問主
人無乃乖好惡嗚呼平生所聞唐太宗切齒不平田舍
翁昨朝墳上土花墮斷碑零落悲秋風

秋崖集卷十五

欽定四庫全書

秋崖集卷十六

宋 方岳 撰

詞

滿江紅

乙巳生日

說與梅花且莫道今年無雪君不見秋崖鬢底莖莖騷
屑筆硯只催人老大湖山不了詩愁絕問簪簪何事下

磯來拋雲月 重省起西山
笏終負却東山履把草堂借
與鷺眠鷗歇烏帽久閒蒼蘚
石青衫今作枯荷葉笑人間
萬事竟何如從吾拙

九日治城樓

且問黃花陶令後幾番重九
應解笑秋崖人老不堪詩
酒宇宙一舟吾倦矣山河兩
戒天知否倚西風無奈劒
花寒虬龍吼江欲醕談天口
秋何負持螯手儘石麟
蕪沒斷煙衰柳故國山圍青
玉案何人印佩黃金斗倘

只消江左管夷吾終須有

和程學諭

蒼石橫筇松風外自調龜息渾不記東臯秋事西湖春
色底處未嫌吾輩在此心說與何人得向海棠爛醉過
清明酬佳節君莫道江鱸憶吾自愛山泉激儘月明
夜半杜鵑聲急人事略如春夢過年光不啻驚弦發怕
醒來失口問諸公今何日

水調歌頭

九日醉中

左手紫螯蟹右手綠螺杯古今多少遺恨俛仰已塵埃
不共青山一笑不與黃花一醉懷抱向誰開舉酒屬吾
子此興正崔嵬夜何其秋老矣盍歸來試問先生歸
否茅屋欲生苔窮則簞瓢陋巷達則鼎彛清廟吾意兩
悠哉寄語雪溪外鷗鷺莫驚猜

平山堂用東坡韻

秋雨一何碧山色倚晴空江南江北愁思分付酒螺紅

蘆葉蓬舟千里菰菜蓴羹一夢無語寄歸鴻醉眼渺河
洛遺恨夕陽中蘋洲外山欲暝斂眉峰人間俯仰陳
迹歎息兩仙翁不見當時楊柳只是從前煙雨磨滅幾
英雄天地一孤嘯匹馬又西風

九日多景樓用吳侍郎韻

醉我一壺玉了此十分秋江濤還此當日擊楫渡中流
問訊重陽煙雨俯仰人間今古此意渺滄洲天地幾今
夕舉白與君浮舊黃花新白髮笑重遊滿船明月猶

在何日大刀頭誰跨揚州鶴去已怨故山猿老借箸欲
前籌莫倚欄干北天際是神州

壽丘提刑

甕社有明月夜半吐光寒淮南草木飛動秀出斗牛間
自有秦沙以後試問少游而下誰捲入毫端補袞仲山
甫冰雪照雲鬢霄漢近繡衣去錦衣還江南且為梅
醉莫道歲將闌三百六旬欲換五百歲終纔始日月兩
循環酌彼金錯落澆此碧琅玕

壽吳尚書

明日又重午挽指玉蒲香勸君且盡杯酒聽我試平章
時事艱難甚矣人物眇然如此騷意滿瀟湘醉問屈原
子煙水正微茫 遡層巒浮疊嶂碧雲鄉眼中猶有公
在吾意亦差強胸次甲兵百萬筆底天人三策堪補舜
衣裳要及黑頭耳霖雨赴梅黃

壽趙文昌

剡曲一逢月乘興到人間蓬萊山在何處鶴骨不禁寒

胸有雲門禹穴筆有禊亭晉帖風露洗脾肝秋入紫宸
殿磨玉寫琅玕問何如趨瑣闥繫絃鞍江濤今已如
此可奈寸心丹我宋與天無極公等如春難老王氣自
龍蟠勲業付浯石留與世人看

別廬山題龍湖閣

宇宙一杯酒暝色倚重湖青山杳杳何處煙水渺愁予
別岸風濤噴薄半夜魚龍悲歎能撼我詩無李白醉不
醒喚起問何如是耶非天莽蒼雪模糊蒼顏白髮如

此空復笑今吾寄語鷺朋鷗侶好在風殮水宿底處不
煙蕪吾亦從此逝從我者誰歟

沁園春

賦子規

儘為春愁儘勸春歸直恁恨深況雨急黃昏寒欺客路
月明夜半人夢家林店舍無煙楚鄉寒食一片花飛那
可禁小凝竚黯紅薦翠老江樹陰陰汀洲杜若誰尋
想朝鶴怨兮猿夜吟甚連天芳草淒迷離恨拂簾香絮

撩亂深心汝亦知乎吾今倦矣甕有餘春可共斟歸來也問淵明而後誰是知音

槩括蘭亭序

汪彊仲大卿襍飲水西令妓歌蘭亭皆不能乃為以平仄度此曲俾歌之

歲在永和癸丑暮春修禊蘭亭有崇山峻嶺茂林脩竹清流湍激映帶山陰曲水流觴羣賢畢至是日風和天氣清亦足以供一觴一詠暢叙幽情悲夫一世之人

或放浪形骸遇所欣雖快然自足終期於盡老之將至
後視猶今隨事情遷所之既倦俛仰之間迹已陳興懷
也將後之覽者有感斯文

用梁權郡韻餞春

鶯帶春來鵲喚春歸春總不知恨楊花多事杏花無賴
半隨殘夢半惹晴絲立盡碧雲寒江欲暮怕過清明燕
子時春且住待新筍熟了却問行期問春春竟何之
看紫態紅情難語離想芳韶猶剩牡丹知處也須些个

付與荼蘼喚取娉婷勸教春醉不道五更花漏遲愁一
餉笑車輪生角早已天涯

壽趙尚書

蠢彼黠龜嗟爾何為敢瞰長淮遣詩書元帥又勞指畫
神仙壽日不放襟懷略已三年可曾一笑天豈慳吾老
子哉諸人者且攜將雅頌留待磨崖我姑酌彼金罍
便小醉寧辭鸚鵡杯問今何時也子其休矣有如此酒
奚取吾儕帝曰不然政須卿輩作我長城惟汝諧凝望

處見紅塵飛騎捷羽東來

和宋知縣致苔梅

有美人兮鐵石心腸寄春一枝喜蘚生龍甲那因雪瘦
月橫鶴膝不受寒欺雲卧空山夢回孤驛生怕渠嗔未
敢詩江頭路問銷魂幾許索笑何時賦成字字明珠
君莫倚家風舊解題歎水曹安在飄然欲去逋仙已矣
其與誰歸煙雨愁予江山老我畢竟歲寒然後知微酸
在儘危譙斜倚殘角孤吹

和趙司戶紅藥

把酒問花璽栗梢頭春今幾何笑身居近侍階翻萬玉
面勻菩薩髻擁千螺一一牙籤英英碧字占定花間甲
乙科歸來也傍紫薇吟處揉作陽和祇今花事無多
看幾許風煙付與他待圍將翡翠怕蜂沾粉織成雲錦
遣鳳銜梭誰剪并刀贈之燕玉莫負雙娥嬌溜波花應
道儘花強人面底用能歌

和林教授

子盍觀夫商丘之木有樗不才縱斧斤睥睨何妨雪立
風煙傲兀怎問春回老子似之倦遊久矣歸矚漁蓑藁
芋魁村鉏外聞韭今有子芥已生臺天於我輩悠哉
縱作賦問天天亦猜且醉無何有酒徒陶陸與二三子
詩友陳雷正爾眠雲阿誰敲月不是我曹不肯來君且
住怕口生荆棘胸有塵埃

望江南

乙未生日

時赴官淮東以是日次南徐泊舟普照寺
下侍親具湯餅寺中門有扁曰壽丘山親
意欣然蓋以丘山為岳字云

梅欲老撐月過南徐家口縱多難減鶴路程不遠易攜
書只是廢春鋤霜滿袖茶竈借僧廬湖海甚豪今倦
矣丘山雖壽竟何如一笑薦冰蔬

蝶戀花

用韻秋懷

鴈落寒沙秋惻惻
明月蘆花共是江南客
騎鶴樓高邊羽急
柔情不盡淮山碧
世路只催雙鬢白
菰菜蓴羹正自令人憶
歸夢不知江水隔
煙帆飛過平如席

又

山抹脩眉橫綠淨
浦漱生寒立
盡梧桐影
香炷未消簾幙靜
醉紅如洗風吹醒
一夜秋聲連玉井
夢落孤篷已盡
山陰興
戍角淒涼清漏永
江南煙雨何堪省

又

秋水涵空如鏡淨，滿鏡清寒倒碧搖。
山影葯戶誰攄圓，玉靜碧紗人怯黃昏醒。
叢桂小山寒井井，喚起江南一葉蓴。
鱸興先自新愁愁，夜永不堪宋玉重提省。

木蘭花慢

吳尚書宴客漣滄觀即席用韻

慨清江渺渺乘風下，倚滄浪問許大乾坤。
金焦兩點曾幾興亡，平章古人安在，但青山煙水共微茫。
不道鷺嘲鷗笑，歸來鬢已蒼蒼。
垂楊舞盡斜陽，雙燕語儘渠忙。

黯柔情不管花深傳漏羽急飛觴思量人間如夢放半
分佯醉半佯狂明日海棠猶舊春風未老秋娘

如夢令

春思

知是誰家燕子直恁惺鬆言語深入繡簾來無奈落花
飛絮春去春去且道干卿何事

海棠

雨洗海棠如雪又是清明時節燕子幾時來只恐為花

愁絕愁絕愁絕枉與春風分說

賀新涼

別吳侍郎

吳時閒居數夕前夢枯梅成林一枝獨秀
霜月寒如洗問梅花經年何事尚迷煙水夢著翠霞尋好句
新雪欄干獨倚見竹外一枝橫藥已占百花頭上了料詩情不
但江山耳春已逗有佳思一香吹動人間世奈何地叢篁低碧
巧相虧蔽儘讓春風凡草木便做雲根澗底但留取微酸滋

味除却林逋無人識算歲寒只是天知己休弄玉怨遲暮
戊戌生日用鄭省倉韻

問訊江南客怕秋崖苔荒詩屋雲侵山屐留得釣竿西
日手夢落鷗傍鷺側倩傳語溪翁將息四十飛騰斜暮
景笑雙蓬一懶無他畫惟飽飯散輕策世間萬事知
何極問乾坤待誰整頓豈無豪傑水驛山村還要我料
理松風竹雪也不學草顛詩白自有春蓑黃犢在儘諸
公寶馬搖金勒容我輩醉雲液

寄兩吳尚書

鴈向愁邊落渺汀洲孤雲細雨暮天寒角有美人兮山
翠外誰共霜橋月壑想朋友春猿秋鶴竹屋一燈暮未
了問人間局面如何著風雨夜更商略六州鐵鑄從
頭錯笑歸來冰鱸堪鱸雪螯堪嚼莫遣孤舟橫浦溆也
怕浪狂風惡且容把釣綸收却雲外空山知何似料清
寒只與梅花約逋老句底須作

戊申生日

一笑君知否笑當年山陰道士行歌樵叟五十到頭公
老矣只可驚朋鷗友便富貴何如杯酒好在歸來蒼崖
底想月明不負攜鋤手誰共酌剪霜韭 乾坤許大山
河舊幾多人劍倚西風筆驚南斗俛仰之間成陳迹亡
是子虛烏有渺煙草不堪回首隔塢築亭開野徑儘一
筇兩屨山前後春且為催花柳

己酉生日用戊申韻時自康廬歸猶在道也
天意然乎否待相攜風煙五畝招邀迂叟屋上青山花

木野儘可兩朋三友笑老子只堪棊酒似恁踈頑何為
者向人前不解高义手寧學圃種菰韭春猿秋鶴皆
依舊怪吾今鬢已成絲膽還如斗誰與廬山麾之去爾
輩何留之有黯離緒暮江搔首非我督郵猶束帶這一
歸更落淵明後君試問長亭柳

西江月

以兩鶴壽老人

茅屋何堪翠袖芝田自有霓裳一雙雪舞碧雲鄉富貴

人家以上 竹外山童敲白梅
邊溪友傳觴青霞道服
石爐香便是壽星模樣

和鄭省倉韻因以為壽

燕子催將初度梨花指定清明春風可是太多情
樂事良辰一併絳老從頭甲子楚騷幾度庚寅
晴光不隔鳳凰城花底舉頭天近

又

蔬甲初肥雨潤茶鎗小摘春明野籬是處可詩情
打過

下湖船併捷報秋來旁午賢闕早晚同寅綠楊連騎
帶春城不問南山遠近

一落索

九日

瘦得黃花能小一簾香杳東籬雲冷正愁予猶幸是西
風少

葉下亭臯渺渺秋何為者無錢持蟹對黃花又孤負重
陽也

漢宮春

壽王尉

雲澗之癯有詩盟未了鷗泛江湖一官直為仙耳不受
塵驅高情逸韻自蘭亭已後都無準擬畫剡舟夜雪與
君相對成圖半竹苔寒如此問誰歟來者鶴伴熏爐
何如貯之天上風露冰壺江南春早想梅花不肯欺吾
疑便是孤山之北水香月影林逋

探梅用瀟灑江梅韻

問訊何郎怎春風未到却月橫枝當年東閣詩興夫豈
吾欺雲寒歲晚便相逢已負深期煩說與秋崖歸也留
香更待何時 家住江南煙雨想疎花開遍野竹已籬
遙憐水邊石上煞欠渠詩月壺雪甕肯相從舍我其誰
應自笑生來孤峭此心却有天知

酹江月

夢雪

問天何事雪垂垂欲下又還晴却春到梅梢香逗也儘

有心情行樂剡曲舟迴灞橋詩在一笑人如昨此情分
付暮天寒月殘角誰道飛夢江南羣山如畫一一瓊
瑤琢中有玉田三萬頃云是幼輿丘壑招我歸來和春
醉去休跨揚州鶴萬花曾約酒醒當有新作

八月十四小集鄭子重帥參先月樓是夕無
月和朱希真插天翠柳詞韻

綠尊翠勺約秋風一醉小樓先月誰取寶奩奔帝所深
瑣玉華宮闕老桂香寒踈桐雲重生怕金蛇掣那知天

柱一峰別與天接 我欲飛珮重遊真之衣袖照我襟
懷雪玉斧難藏修月手待做明宵清絕天地無塵山河
有影了不遺毫髮舉杯相屬喚誰牋與天說

壽老父

幅巾雲麓笑人生甕等何時是足莫道年家無好處
第一林田新熟孫息垂鸞大兒薦鶚翁已恩袍綠笑談
戎幕儘教岳也碌碌 是則江南江北月明飛夢認得
溪橋屋多少睡鄉閒日月不老柯山碁局唱箇曲兒喫

些酒子檢點茅簷竹問梅開未一枝初破寒玉

戊戌壽老父

且拚春醉問人間誰是十分如意道不好來人又道也
有一分好處管甚長貧只消長健切莫眉頭聚儘教江
路梅花依舊留住兒輩雖不如人有何不可怎敢嫌
遲暮但喜吾翁躔度轉喚起煙霞深痼否極而亨剝餘
而復長至迎初度龜圖羲畫直從今日重數

是年六十
四屬有未

疾而生日
適冬至也

萬花園用朱行父韻呈制帥趙端明

花風初逗喜邊亭依舊春間營柳煙草隋宮歌舞地誰
遣萬紅圍繡結酒因緣裝春富貴也要經綸手笙簫聲
裏一江晴綠吹縐是處羽箭如飛那知鶴府花壓欄
干畫油幙文書談笑了餘事儘堪茶酒報答東風流連
西日綠外沈吟久與春無負醉歸香滿襟袖

和君用

槎牙詩骨想生來無分史闡經幄呵護九關多虎豹誰

道去天一握奏賦兩都聞韶三月鴈遠書難托一寒如
許蟾枝莫倚高擢空使滿壑風煙半村雪月孤負梅
花約渺渺愁予初度也山沍同雲垂幙鶴帳何如牛衣
無恙麥隴占優渥不如歸去簷花深夜春酌

送吳丞入幕

祈山底處為二松千竹肯題崖壁雪洒談犀麾鴈鷺爾
輩何煩涉筆使者知乎民其勞止且莫間耕織片言金
石喚回春意無極雖則王謝人家一壠仙澤面作蒼

煙色茶竈筆牀將雨屐吟到梅花消息賤子何為老仙
如問莫道頭今白寒蓑幾夢研朱看點周易

水龍吟

和朱行甫帥機瑞香

當年睡裏聞香阿誰喚做花間瑞巾飄沉水籠熏古錦
擁青綾被初日酣晴柔風逗暖十分情致掩窓綃待得
香融酒醒儘消受這春思從把萬紅排比想較伊更
多些子詩仙老手春風妙筆要題教似十里揚州三生

杜牧可曾知此
趁紫唇微綻
芳心半透與
騷人醉

和朱行父海棠

畫長庭院深深
春柔一枕流霞醉
矇鬆欲醒嬌羞還困
錦屏圍翠豆
蔻初肥櫻桃微綻
玉欄同倚記華清浴起
渭流波暖紅漲膩
棄脂水燕子來時
天氣儘韶風與
詩為地芳叢雨歇
露痕日醺英英仙意
莫恨無香最憐
有韻天然情致待問
春能幾五更猶是拚
今宵睡

滿庭芳

壁蟹醉題

半殼含黃雙螯臂紫風流渾是蘆花江頭秋老誰了酒
生涯玉質金相如許怎消受明月寒沙橙香也不閒左
手除是付詩家草泥行郭索橫戈曾怒張翰浮誇笑
鱸魚雖好風味爭些醉嚼霜前鬆雪江湖夢不枉歸槎
停杯問余其負腹是腹負余耶

喜遷鶯

和余義夫行邊聞捷

淮山秋曉問西風幾度鴈雲蛩草鐵色驄驕金花袍窄
未覺塞垣寒早笳鼓聲中晴色一羽不飛邊報君莫道
怎乾坤許大英雄能少談笑鳴鏑處坐擁貔貅烽火
傳音耗漠漠寒沙荒荒殘照正恐不勞深討但喜歡迎
馬首猶是中原遺老關河事待歸來細話一尊傾倒

浣溪沙

趙閣學餉蠮螬酒春螺

半殼含潮帶靨香雙螯嚼雪迸臍黃蘆花洲渚夜來霜

短棹秋江清到底長頭春甕醉為鄉風流不枉與詩
嘗

壽潘宰

夜醉淵明把菊圖宿醒扶曉又冰壺秋香留得伴雙鳬
併日蒲浮金鑿落明年初賜玉茱萸更書欲上有除
書

齊天樂

和楚客賦蘆

孤篷夜傍低叢宿蕭蕭雨聲悲切一岸霜痕半江煙色
愁到沙頭枯葉澹雲沒滅黯西風吹老滿汀新雪天豈
無情離騷點點送歸客歸去來兮怎得儘鷺翹鷗倚
乍寒時節秋晚山川夕陽浦溆贏得別腸千結濤翻浪
疊那得似西來一筇橫絕搔首江南鴈銜千里月

花心動

和楚客憶梅

雪帶邊寒渺愁予雪中誰抱奇節遜在揚州逋老孤山

芳信頓成消歇江南茅屋今安在疎影瘦祇堪嘆息歸
來未沙頭立盡暮天雲碧自笑梁園賦客倚舊日鞍
韉春風巾幘問訊橫枝暖熱新花無處訪尋詩閣幾年
不見冰霜面知誰共批風支月歸來也鷗盟不妨再結

風流子

和楚客維揚燈夕

小樓簾不捲花正開燈火競春宵想舊日何郎飛金巨
羅三生杜牧醉董嬌饒香塵路雲鬆鸞髻翳月襯馬蹄

驕彷彿神仙劉安雞犬分明富貴子晉笙簫 人生行
樂耳君不見迷樓春綠迢迢二十四經行處舊月今橋
但索笑梅花酒消新雪縱情詩草筆捲春潮俛仰人間
陳迹莫惜金貂

瑞鶴仙

壽丘提刑

歲十二月二十有九日實維繡衣使者煥
章公紱麟盛旦也岳敢拜手而言曰月窮

于紀星回于天蓋三百有六旬有六日於是焉極而歲功成矣惟天之運循環無窮一氣推移不可限量其殆極而無極歟分歲而頌椒守歲而爆竹人知其為歲之極耳洪鈞轉而萬象春瑤厯新而三陽泰不知自吾極而始也始而又極極而又始元功寧有窮已哉天之生申於此時意或然也岳既不能測識而又舊為場屋士不能

歌詞輒以時文體按譜而腔之以致其意
一年寒盡也問秦沙梅放未也幽尋者誰也有何郎佳
約歲云除也南枝暖也正同雲商量雪也喜東皇一轉
洪鈞依舊春風中也香也騷情釀就書味熏成這些
情也玉堂深也莫道年華歸也是循環三百六旬六日
生意無窮已也但丁寧留取微酸調商鼎也

壽宋倅

七月二十三日

中元纔過節正宇宙澄清一天寒碧涼颼動秋色筭佳

辰恰是下弦當日天生俊傑富文才瑰奇挺特看葱葱
和氣薰城共慶武夷仙伯難得釣鼇連六虎榜登名
新題淡墨從容蓮幕遊花縣無邀隔縱風流別駕難淹
紫詔行對天顏咫尺更堪誇萱草長春紅衣交列

哨遍

問月

月亦老乎勸爾一盃聽說平生事吾問汝開闢自何時
有乾坤更應有爾年幾許鴻荒邈哉遐已吾今斷自唐

虞起緊帝曰放勳甲辰踐阼數至今宋嘉熙凡三千五百二十年餘嗟雨慙風儻幾盈虧老兔奔馳癡蟆吞吐定應衰矣噫月豈無悲吾觀人壽幾期頤炯炯雙眸子明清無過嬰兒但纔到中年昏然欲眊那堪老矣知何似以此推之吾言有理不能不自疑耳恐古時月與今時異恨則恨今人不千歲但見今冰輪如洗阿誰曾自前古看到隋唐世幾時明潔幾時昏暗畢竟少晴多雨須臾月落夜何其曰先生寘之姑醉

用韻作月對和程申父國錄

月曰不然君亦怎知天上從前事吾語汝月豈有弦時
奈人間井觀乃爾休浪許歷家繆悠而已誰云魄死生
明起又明死魄生循環晦朔有老兔自熙熙妄相傳月
逝日光餘嗟萬古誰知了無虧玉斧修成銀蟾奔去此
言荒矣噫世已堪悲聽君歌復解人頤挂魄何曾死
寒光不減些兒但與日相望對如兩鏡山河大地無疑
似待既望觀之永輪漸側轉斜纔一鈎耳論本來不與

中秋異恐天問靈均未知此又底用咸池重洗乾坤一點英氣寧老人間世飛上天來摩挲月去纔信有晴無雨人生圓缺幾何其且徘徊與君同醉

眼兒媚

泊松洲

鴈帶新霜幾多愁和月落滄洲桂花如許菊花如許怎不悲秋江山例合閒人管也白幾分頭去年曾此今年曾此煙雨孤舟

鵲橋仙

七夕送荷花

銀河無浪瓊樓不暑一點柔情如水肯捐蘭珮了渠愁
儘閒却纖纖機杼波心沁雪鷗邊分雨剪得荷花能
楚天公煞自解風流看得我如何銷汝

辛丑生日小盡月

今朝廿九明朝初一怎欠秋崖箇生日客中情緒老天
知道這月不消三十春盤縷翠春缸搖碧便泥做梅

花消息雪邊試問是耶非笑今夕不知何夕

玉樓春

秋思

木犀過了詩憔悴只有黃花開又未秋風也不管人愁
到處相尋吹短袂 露滴碧觴誰共醉腸斷向來攜手
地夜寒牋與月明看未必月明知此意

虞美人

見梅

鷗清眠碎晴溪月幾夢寒蓑雪斷橋籬落帶人家枝北
枝南初着兩三花 曾於春底橫孤艇香似詩能冷娟
娟立玉載歸壺渺渺愁予肯入楚騷無

一剪梅

客中新雪

誰剪輕瓊做物華春遶天涯水遶天涯園林曉樹恁橫
斜道是梅花不是梅花 宿鷺聯拳倚斷槎昨夜寒些
今夜寒些孤舟蓑笠釣煙沙待不思家怎不思家

燭影搖紅

立春日東高內翰

輦路融晴宮雲逗曉青旂報梅邊香沁綵鞭寒初信花
風到笑語誰家簾幙鏤冰絲紅紛綠開髻橫玉燕鬢顫
瓊幡不能知掉 看見春來麴塵微漲催蘭櫂嬌黃拂
略上柔條等得鶯眠覺引出千花萬草喜攬先椒盤竹
爆問誰天上瑤帖初供玉堂歸俖

最高樓

壬寅生日

溪南北本自一漁舟
煙雨幾盟鷗
白魚不負鷗
鷗杓青
蓑不減鷗
鷗裘怎無端
貪射策
覓封侯
既不似古人
能識字
又不似今人
能識事宜
老去自宜休
帝鄉五十
六朝暮
人間四十四
春秋問何如
茅一把
橘千頭

壽黃宰

七月十六日

朝元了萬鶴放班回
攜月下天來
初平家看青羊石
滕王閣醉綠螺杯
試鳴琴花蕩漾
玉崔嵬
前十日鵲橋

飛寶轡後一月兔奩開玉鏡秋色淨夜徘徊申從五嶽
三光出亥將二首六身排問何其餐沆瀣譙蓬萊

和人投贈

秋崖底雲卧欲生苔無夢到公台有月鋤曉帶烏捷去
與煙蓑夜釣白魚來問誰能供酒料辦詩材 君莫笑
閒忙棊得勢也莫笑浮沉魚得計胸次老雪崔嵬付老
夫小小鸕鷀杓儘諸公衮衮鳳凰臺且容儂多種竹剩
栽梅

行香子

癸卯生日

說與樵青緊閉柴門道先生檢校東屯阿戎安在未掃
愁痕且免歌詞休載妓莫攜樽梅自生春雪立前村
道此盃酒也須溫無窮身外付與乾坤誰共耕山間釣
水飽窺園

江神子

牡丹

窓綃深隱護芳塵翠眉顰越精神幾雨幾晴做得這些
春切莫近前輕着語題品錯怕渠嗔碧壺誰貯玉粼
粼醉香茵晚風頻吹得酒痕如洗一番新只恨謫仙渾
懶却辜負那倚欄人

發金陵

梅花吹夢過溪橋路迢迢雪初消似恁天寒詩瘦想無
聊聽得草堂人有語能幾日是生朝亂雲深處洗山
瓢鬢蕭蕭酒紅潮回首六朝南北黯魂銷縱使鍾山青

眼在終不似侶漁樵

水調歌頭

慶平交

七月十七

世不乏季子藉甚有休聲芝蘭挺秀庭砌廣厦萬間新
胸次金天爽豁風骨玉堂清徹才器更輪囷勁節九秋
榦和氣萬家春過中元纔兩日是生辰瓣香西上都
向此夕頌殷勤自有陰功天佑合享人間長壽不獨我
知君從此見今日丹桂伴靈椿

瑞鷓鴣

中元過後恰三朝因甚庭闈喜氣飄
李謫若非當此夕
申生應是在今宵
滿斟綠醕歌檀口慢拍紅牙舞柳
腰富貴榮華誰得似祝公千歲樂逍遙

酹江月

壽松山主人

七月十九日

楚天秋早過中元撚指螢飛四莢怪得于門佳氣滿恰
值生申時節蓬矢當年椒盤今夕瑞木金爐熱主人情

重酒紅潮上雙頰 且看戲綵鼎分丹桂蘭玉同班列
更喜萱庭南極老親授長生秘訣養浩頤然後昌青紫
天報公陰德年年盛會祝延椿筭千百

滿庭芳

壽劉參議

七月二十日

秋入西郊律調夷則韓堂風露清涼洞天昨夜響動玉
玎璫朱戶銀鑲放鑰長庚夢應誕星郎垂弧旦冀飛五
莢簪履共稱觴 未施經濟手暫參雄府公論聲揚便

好趁昌辰入輔吾皇況是中興啓運正當寧夢想循良
從茲去萬年佐主福壽總無疆

壽通判

七月二十二日

星昴呈祥山川鍾秀果然生此真賢精神瑩澈秋水共
長天況值西風初起中元七日涼先庭院爽稱觴賀客
車馬看駢闐開筵稱壽處紅袖歌舞脆管繁絃願公
與椿松對閱天年縱使平分風月不容暫吟醉苔川龍
光近行看鳳詔促入秉鈞權

百字謠

壽丘郎

七月二十四日

河南靈地信從生俊傑皆由天佑見說簪纓稱世襲復
是青氈還舊學海淵源筆端鋒鏑未遜誰居右使臺暫
贊直須黃閣環授欣遇初度良辰中元節過九日方
稱壽好看萊衣偕舞處盡羨一門三秀名過河東迭居宰
職復見韋平胄祝君遐算南山松柏長茂

滿江紅

壬子生日

曉傍蒼崖滴寒露研朱點易五十四卦為歸妹惟幽人
吉彼美人兮春上下如吾徒者山南北辦一生堅壁卧
煙霞詩無敵人間世膠中漆功名事刀頭蜜放乾坤
醉眼看朱成碧曾共梅花相爾汝儘教雪後無消息莫
怕寒容易嫁東風春狼籍

哨遍

隰括盤谷序

盤谷者何環以兩山隱者盤旋吾友人惟李愿居之曰
人生我知之矣大丈夫名聲昭于時世廟朝歸佐吾天
子其在外旗旄呵前弓矢塞途供給如許更爭妍列屋
自閒居有長袖飄風翳輕裾便體清聲豐頰曲眉取憐
得意噫吾豈逃之是皆有命非吾事吾退而野處濯
清泉坐嘉樹幸釣水有鮮採山可茹起居惟適之安耳
儘車服不維誰如刀鋸孰如無譽無毀彼公卿奔走口
躡嚅賢不肖于人又何如乃為歌與之姑醉歌云盤谷

幽只繚曲深而窈其泉可濯可湘清泚盤樂樂無央只
膏我車只秣我駒將于盤從子遊只

水調歌頭

癸丑生日

老子興不淺歸矣復言歸不知歸又何處知我者何希
幸有青山一片付與白雲千載便可樂漁磯且盡一杯
酒春甕曉生肥倩梅花邀澗叟醉林扉吾今年已如
此莫倚健于飛日月籠中雙鳥今古人間一馬五十五

年非歸去不歸去未了北山薇

和羅足贈示

醉石午陰合高枕聽松聲人間俛仰今古一笑幾虧盈
檢校牛衣無恙問鷗盟故在身後底須名甚矣吾衰
矣老氣不能英酒猶堪尋逸少對公榮帝鄉知在何
處煙水老吟情屋後屋前青嶂村北村南黃犢付與短
歌行留得荷鋤手未覺負平生

浣溪沙

餞臘

太乙東皇欲轉鈞玄冥連夜碾歸輪冰痕不動玉璘璘
酒氣力消寒氣力梅精神是雪精神相將好去轉頭
春

迎春

看見嬌黃拂柳芽銀幡誰彈髻蟠鴉一簾晴色滿天涯
冰縷未醒連夜酒雪籬留得去年花東風也肯到吾
家

守歲

暖入屏爐一笑融
燈花成綫綴釵蟲
醉微微莫睡勿勿
寶炷燒殘銀鴨暖
雪花飛起玉麟紅
春風不等五更鐘

賀正

曉色纔分笑語喧
詔鴉飛下九重天
瓊幡雪柳拜花前
最後屠蘇人老大
攬先菑菑玉嬋娟
一年年勝一年年

沁園春

和趙尉重九

渺渺西風獨立空山吾亦快哉儘兩蓬霜雪竹深藏徑
半畦煙水崧晚生臺看作麼生管他誰子緊閉柴門不
要開且容卧夕陽襪襖秋雨蒿萊一筇兩屨徘徊也
不問白衣來不來莫向黃花談身外事已將白日付掌
中杯金屑琵琶銀銜叱撥畢竟面橫三尺埃之人者斷
無詩問柳有暇尋梅

再和韻

客有謂予野眺何如予曰可哉乃攜酒與魚共尋秋徑
乘風化鶴感慨荒臺能幾重陽已無老子人世何妨笑
口開蒼厓下有二犂膏雨十畝汙萊掉頭只麼低回
彼軒冕時來自儻來夜半飯牛無心扣角霜前擘蟹有
手持杯野屋雲深帝城書斷堅卧三年一硯埃贏得底
是唐詩晉帖潜菊逋梅

和趙尉

冰雪之崖雲月之溪有黃冠師問北里南鄰誰家有酒
東岡西崦何處無詩骨相猿獠心情鷗鷺著在空山亦
不辭君知不那貧猶易忍懶最難醫 謂予何許人斯
也自恐梅花未必知笑白日貫虹於今老矣青山騎犢
何相如之許大乾坤亡無今古不奈人生七十希誰與
者共天台種秫地脈耘芝

再和

五字其城百斛其兵吾能進師笑半世虛名虛逃乎酒

一雙閒手聊寄于詩老去離支興來碑兀猶解商歌與楚
辭終未肯放陶巾入務阮屐尋醫問君何取于斯語
鷗鷺勿令兒輩知儘空谷煙寒適堪高卧前村雨暗子
欲何之休上青冥且烹黃犢此味人間知者希吾與汝
是方干後葉趙子靈芝

春感

花汝知乎風雨一春島瘦郊寒笑紅杏村莊久孤山屐
綠楊溪寺未識吟鞍纔有相攜徑須醉去何必年時素

所歡且住待茶蘼芍藥併與題看 癯仙露吸風殫儘
雪白髭鬚顏渥丹方喚鰕鰂耕雲半島號沉冥子卧月
三間衮衮諸人悠悠千古老眼觀之匹似閒蒼厓外但
留些詩付與方干

滿庭芳

甲寅生日

面帶蒼煙鬚粘殘雪幾年今日秋崖梅花籬落不減舊
情懷更覺神仙有分一條冰羽客官階朝真外研朱點

易風露滴松釵 蓬萊清淺未吾將
游戲月塢雲齋已 相期汗漫鶴蛇青
鞋一念人間塵土為雛孫留醉茅柴
今而後村書雜字儘有老生涯

江神子

丙辰生日


幾年詩骨雪槎牙 痼煙霞 老生涯
五十八翁堪喜 亦堪嗟 忽憶香山
居士語 還失笑 較爭些 荒寒梅
塢月橫斜 短籬遮 野人家 枝北枝南
須有兩三花 緊閉

竹門傳語客那得暇儘由他

最高樓

壽王貳卿

秋好處晚節一籬香幾日又重陽有老人呈現羲皇上
指癰仙家近斗牛傍久無心青玉案紫荷囊更五歲伏
生書始授又五歲武公詩始就渾未覺鬢眉蒼便宣麻
文德誰云老問挂冠神武一何忙要人知霜髓換碧瞳
方



秋崖集卷十六